

柳田文庫
文庫11
D 147
4



文庫刊
D 147
4

010190553537

大雅集叙

古者天子巡守命太史陳詩以
觀民風蓋將以探民生之休戚
以知王政之得失此周人所以
不能已于采詩之官也故觀民
風而必采詩以陳者民之情因
言以宣猶物因風之動以有聲

也則詩志之所存情之所感而
言之所從以出者乎但上之化
下也有淋慝之分則下之報上
也有美刺之別然發乎情止乎
禮義樂而不淫哀而不傷雖刺
也主文而譎諫言之者無罪聞
之者足以戒此詩人忠厚之至

也然則周人所以采之者不以
其出于情之真乎由是知古之
人以情爲詩而其言莫不麗以
則後之人則以詩爲情而言不
出于情有矣况麗而有不則者
哉古之詩多出于民之心後之
詩多出于士之筆雅頌之作固


能之而風或不之及蓋心匪鬱
伊而寫其幽思者非情之真也
惟中心感發者然後足以吟詠
其性情耳故後世雖有采詩者
實難其人焉然有慷慨以鼓其
氣磊落以驅其才若杜少陵輩
則不能無風雅之作耳若此者

雖微采詩之官識者能采之矣
天台賴先生善卿以三十年之
勞不憚駕風濤犯雨雪冒炎暑
以采江南北詩人之詩其采也
公矣情深而不詭則采之風清
而不雜則采之事信而不誕則
采之義直而不回則采之體約

而不蕪則采之詞麗而不淫則
采之而未始有不關于世教者
吁亦勤矣哉非其學博而守約
得詩人之真趣者不能造斯域
也會稽楊鐵厓先生批評而序
之命篇曰大雅集而友人盧仲
莊氏手爲之鏤梓既版行學者

莫不購之以爲軌式焉他日有
采詩之官者出其必將善卿之
所采以進于上矣于是乎序時
至正壬寅春吳興錢鼎在雲間
之水南山北寫

大雅集敘
客有賴良氏來謁余七者寮致
其請曰昔山谷老人在州歎曰
安得一奇士有力者盡刻杜公
東西川及夔州詩使大雅之音
復盈三巴之耳有楊生素者任
之刻石作堂因以大雅名之先



生鐵厓雖已徧傳海內而兵變後諸作人未識者有之識其詩付有力者刻之亦使大雅之音盈於三吳之耳不亦可乎余曰東南詩人隱而未白者不少也吾詩不必傳請傳隱而未白者於是去游吳越間采諸詩於未

傳者得凡若干人詩凡若干首將梓以行來徵集名吁良亦竒士哉偉其志而爲之出力以鋟者則淞士夫謝履齋氏余因以山谷語名之曰大雅集蓋良以待我而我以待諸公庶入是集者皆可以續杜之後而或有慊

焉者不入也良曰然書諸集爲
敘至正辛丑立秋日丙午鐵厓
道人楊維禎書

大雅集後序

天台賴善卿客授雲間課講暇
嘗哀元之詩鳴者凡若干人篇
帙凡若干首類爲八卷名曰大
雅集會稽鐵厓楊公首叙且鉞
且傳會兵變止今年善卿擬畢
初志適有好義之士協成厥美

詣余徵序後余謂詩具一經詩
亡春秋作噫詩奚亡特雅亡耳
楚騷漢賦迨蘇李五言公至唐
近體皆古詩之變試觀唐數百
名家譬之宗廟器大而鐘鼎瑟
琴小而籩豆爵壘錯而有章秩
而有文要各備材用而不可一

少焉道學于宋刑學于金其間
鳴于詩者務亦出自機杼近代
自虞文靖公近體詩行天下雷
然爭傲競鬪恐後弊甚一律千
首較之唐遠矣夫採珠者極桂
海採玉者窮水天善卿不私已
而汲汲以詩是採猶水天桂海

是窮則春容鉅作幻眇短詠不
但得照乘連城而已將宗廟之
器若錯而章秩而文也詩運環
復大雅之音於是乎在義士雲
間人陸德昭氏俞伯剛氏善卿
名良宋名臣諱好古裔世業儒
云席帽山人王逢序



大雅集卷之一

天台賴良善卿編輯

會稽楊維禎蔗夫評點

李孝先

字季和號五峯永嘉人

箕山操和鐵厓先生首唱

箕之陽兮其木琴
箕之冢兮白雲幽
彼世之人兮孰能遺我
以憂雖欲從我兮
其路無由朝有人兮來
飲其牛

評曰善作琴操然後能作古樂府

和余操者李季和為最其次夏大
志也附鐵厓先生首唱曰箕之山
兮可耕而樵叶因箕之水兮可飲
而游牽牛何來兮飲吾上流彼以
天下讓兮我以之逃叶投世豈無
堯兮應堯之求吾與堯友兮不與
堯憂

題太乙蓮舟圖

銀河跨西海秋至天為白一片玉芙蓉洗

出明月魄太乙真人挾兩龍脫巾大咲眠
其中鳳麟洲西與天通扶桑乃在碧海東
手把綠雲有兩童掣鵬二鳥開金籠

評曰此作又是李騎鯨也孰謂此
老椎鈍無爽氣耶二鳥作日月看

項字可立天台人

公莫舞

龍蟠錦帳金奔斗帟旗無際人馬立肉林
垂蓋陵阜赤萬甕行酒晴虹濕大蛇中斷

狂魄滅重瞳無光射寶玦雷憤風愁三尺
鐵河山未必如瓜裂老荒粹珥語公莫頭
上青天懸日月

評曰錦囊子有奇語無此奇氣

吳宮怨

繡楣洒黃粉榭壁漲紅青倚簷樹如鬼草
深蛇夜鳴髑髏已無淚古恨埋石扃

評曰十字惜過牛鬼髑髏無淚尤
勝無語

夏

溥字大志號虎怕道歟淳安人

鴻門歌

大風揚兮赤雲屯楚人望氣皆龍文當時
吾甚咲亞夫幸至彭城疽背死誰云沐猴
竟遭烹汝乃盛怒咲孺子嗟哉拔山之力
不可得扶義而西取天下者以三尺君看
項王重瞳舜重瞳天命乃在隆準公

吳山謠和鐵厓首唱

中興過江咲諸人二十三表哀老臣倡和

國事可斬檜馬上青衣竟何在采石未靖
瓜州驚戰功今乃歸儒生第一峯前誰立
馬夜箭射血來帳下

評曰二作不用二李別有一種史
斷附鐵厓首唱曰中原四日一日
東山草木無金風良精重起大
小岳此是趙家天柱峯天柱裂地

維缺老檜

陸居仁

字宅之號雲松野褐雲間人

楚人弓

楚人弓懸兩石五十萬矢陷強敵絳人弓
箭三隻長歌入關成偉績多箭不如少箭
力制敵若在弓矢間鳴條牧野高于山

評曰史斷入詩箴警多矣

國馬足

國馬足吉行五十轡如沃天馬足一日千
里更神速國馬天閑飽芻粟太行鹽車天
馬哭

評曰自記可悲句短而意無窮

陳

樵

字君采著書曰鹿皮子東陽人

夜闌曲

碧宇星回夜漫，靈蕪烟煖重薰。薦冷翠
香銷青桂枝，冰荷蓋光。遶帷花樓艷舞
金菱蕤，吳羹蜀酒精瓊麋。酒闌半解龍綃
衣，春朝曲渚聞鷓鴣。

七夕詞

內人拜月金鋪戶，鳳宿梧枝秋葉下。露華

入袂玉階寒，織署錦工催祭杼。月下金鈿
照骨明，同心絲繪紅生縷。素瓜碧實上繒
樓，夜闌颺馭下銀州。

瑤臺月

銀河西流烏接翼，回首人間化為碧。瑤臺
月裏可避胡三郎，錯落歸魚鳧。霓裳月裏
親偷得，又恠李暮偷摩笛。

海人謠

海南蠻奴髮垂耳，朝採寶丹涯裏夜光

盈尺出飛魚柏葉收珠寒蕊幽箔連錢
生綠花切玉蠻刀如切水九譯來朝萬里
天北風不動琅玕死

出塞曲

為戍潼關李總管賦

屬鏤夜啼光屬地將軍一出挽槍死行塵
不動人歸市帶甲如雲自天至取君甲兵
為君洗分明袖裏有銀河水手中遺下泥
一丸不封函谷封太山

鴈來紅

東朝一書成百戰上林一書旌節返又傳
驕子一函書人不如禽解邊難自從燕滅
秦晉亡是非直到空中鴈蘇郎寒絕鴈來
紅脚下胡姬殘綵線顏燕在北秦在西鴈
去鴈來無是非

長安有狹斜行

此題行

也

長安出狹斜方駕秦中客云是牛丞相來
自薄家宅薄家萬戶侯朱門暎柝壁長秋
車馬來賓客御瑤席金屋貯尹邢阿嬌淚

露臆燕々慵未妝繁華照春色轉蕙光風
翻趙帶徘徊月到班姬牀班姬輟芳翰紈
扇從風揚明妃鬪百草玉環御雲裝向來
溫柔地盡入白雲鄉何以慰王孫琵琶隨
驕驪何以奉燕々罷舞歌慨慷何以奉明
妃綠珠奏清商嫫母挾無益搔頭愛宮粧
評曰襲格不襲語善學小李者鴈

來紅狹斜行匠意尤遠

張天兩

字伯雨號白曲外史錢唐人

玉笙謠為鐵門笙伶周竒賦

我有紫霞想愛聞白玉笙縣匏比竹無靈
氣昆丘採此十二莖鳳喙啣明珠鳳翼排
素翎金華周郎妙宮徵子晉仙人初教成
月下吹參差群雛亦和鳴緱氏山頭白雲
起七月七日来相迎長謝時人一揮手飄
下滿空鸞鶴聲

評曰甚似太白

延陵公承慶堂詩

大江蒼方兀龍虎輔元之家百神頻望拜
受釐若稽古太清真人閱衆甫新宮潔齋
導天語紛雲郁霞錯承宇虛皇穆然陽衛
武左颺右歛降軫羽縣鐘鏜迅擊鼓赤
金祭服頰朱戶雙珠月明帶寶璐挾以流
黃玉擗具既竣大禮私事舉吉日宗族奉
爵俎青紫系地簪綬組魏張代劍新捧土
饒國開觀治宿莽報君親師物咸覩撫己
一念或未溥西壁考書玄範府寒水層陰

發春照日幽若明沐仁雨道德大非方仙
五月佩六印非適取持旌召趣迹旁午下
土滓埽寧久處天關會規足蹈矩顧天顧
地多黍稌畢志萬年奉明主小史作詩孰
敢侮吁嗟厚德番之祖

評曰不蹈黃庭句意森滿

天池石壁爲鐵厓賦

倪瓚畫

嘗讀枕中記華山閼中吳神泉發其顛青
壁繚其隅春風四山來群綠互紛扶羽觴

曲折行浮花與之俱採珠奪薜荔洗玉弄
芙蓉聲叟頗好名石窪作魚湖鴻乙志草
堂挑烟遂成圖而此滌煩磯閱世如樗蒲
發興雲林子盥手我與摹居然縮地法挈
入壺公壺

悼薛玄卿

元卿難再得本是餐霞人高懷獨超物洞
鑒亦絕倫君自江東我吳下早歲聯翩待
金馬

御榻賜書凡一束仙苑偷桃動盈把紫虛
元君之王訣青城先生教我者感君多道
氣探懷為君寫學士承旨平原公許我與
君揚許同一時標名兩外史羽衣白茅立
下風我還句曲廿餘載君乘輜軒歷烟海
歸錦橋西結草樓下袂被長相待風烟
山水共追尋福臨洞口話離心年深書字
化為碧白首蒼茫成古今聖井山崩數千
尺君從群龍去死迹困頓益車篠領頭此

日思君復何益

奔月卮歌荅鐵厓作

甕社明珠奔入月脫殼正似風蟬潔漁網
出之不敢視滌盡寒花光不滅文昌四星
吞在腹一以金晶大如粟蜃物還來作飲
器日夜雄螭茅屋一扇桃核寬有餘半
葉蕉心卷未舒飲非其人躍如水恠雨盲
風生座隅置之天上白玉盤斗柄挹酒長
闌干李白跳下鯨魚背持勸我飲相交懽

幽宮馮夷爲子泣酌盡海水百恠絕還我
平生老蚌胎許君醉臥蛟人室

王逢

字原吉號蓆帽山人江陰人

婦董行

婦董滕人鎬進妻也與兄順並以
勇稱金季山東亂天兵駐嶧山進
單騎覘之中流矢死順徙家淮南
舉室溺死淮水董爲呂安撫裨將
所獲

北軍南軍和議時兩起對立龍鸞旗星辰
錯亂風雲氣乾坤造就冰雪姿渾家性命
葬魚腹一舸涕泪隨鴟夷長眠自足為義
鬼後死只望全孤兒在腹中兵在目憶
夫心頭臂消肉岱宗誰縷白玉牒汴州衆
撼黃金屋太尉遄歸明主死安撫猶存寡
妻宿羞看人面問消息強通咲道寬羈束
伯順見義勇著鞭銳士裹足鋒爭先道傍
弩伏荆棘底掌上珠還江海邊將門有後

傳世墓祭無所從年中原山河想如
故目斷一點滕州烟

銀瓶小娘辭

宋岳鄂王之女聞王被收負銀瓶
投井死

碧梧月落烏號霜寒泉幽凝金井牀綺疏
光流大星白夢驚萬里長城亡女郎報父
收囹圄匍匐將身贖無所官家聖明如漢
主妾心媿死緹縈女井臨交衢下通海

枯嚮遷井不改銀瓶同沉意有在萬歲千
秋露神彩魂今歸來風儵然趙陵無樹容
啼鶻阿爹墓木西湖邊

留

睿

字若愚括蒼人

思親行寄弟子通

今年八月來作客出門倏忽已幾百自從
二十走湖海零落天涯幾岑寂幾岑寂重
悲嘆親在高堂望子還子在長途衣亦單
准擬明年作官食君祿歸來共汝舞袖紅

嫵爛天目之山去天不盈尺使吾登之徘
徊望鄉國吁嗟何不生羽翼吁嗟何不生
羽翼

寄遠

征夫往幽燕賤妾住吳越參商二十載綠
鬢生華髮年々望飛鴻目斷愁不歇秋盡
冬復春葉落花更發恨君顧妾身不如天
上月々行幾萬里東出復西沒又東出夜
光夜光頻照妾々容謾比花君情遽如葉

念欲走從君河廣詎可涉燕趙多美人顏
色皎如雪所樂在新知誰復念離別雪性
本飄蕩月質易虧缺何如賤妾心不轉堅
如鐵君看望夫石千載名不滅

代遠人作

憶昔發江南與君生別離臨當上馬時屬
君兩男兒幼兒在襁保長兒能歌詩功名
豈可必三載以爲期君時聞我言感額雙
蛾眉一去數千里各在天一涯塞北望江

南憶君不知目送南征鴻遠寄長相思
相思心不絕綿綿如藕絲蹉跎二十秋日
月互推移三載約會面斯言遂成欺前年
離燕山遠行到月氏途中天雨雪寒風裂
我肌六月陰山道猶復衣羊皮馬上多胡
姬顏色如燕脂爲君不忍覩君何自狐疑
雕鞍駕朱輪行當似蘇秦千金會舊友推
牛會衆親莫學會稽婦容易輕買臣

袁藏用

字顯仁古汴人

春雨嘆

天陰 晝多雨輕薄陌頭花無數成塵土
明朝蕭颯陰風寒祇恐摧折青琅玕山中
嫩人看相倚淚濕翠袖時難乾

袁

舉

字仲微號浮游生江陰人

乙巳寒食

香風吹面東方來櫻桃花發柳眼開鸞簫
聲歇幽蘭咲十二樓前青爵叫王母騎龍
愁暮雲碧桃過眼三千春北山佳城久無

主寒食心摧淚如雨自驚髮薄不勝梳心
事披搖為誰語

舟過三江口

吳淞合流三百里一幅蒲帆掛春水
繞舡黃鳥啼盤迴如在巴渝裏沙上游龍
滴血紅風吹老魚浪花起凝雲不流神姬
哭萬古胥魂招不復客浩歌誰相續淒遲
零落漸離筑思家何處問津迷鷓鴣聲裏
垂楊綠

大雅集卷之一

大雅集卷之二

天台賴 良善卿編輯

會稽楊維禎庶夫評點

孫華 字元實華亭人

池中白蓮

蕊宮夜涼張暑宴仙姝散花水晶殿霞綃
中單雲錦綠黃金為房玉為鈿翠旌導前
寶蓋殿霓裳中序按未遍一人素衣持羽
扇頽然中立白玉弁群姝被酒酡發面冠

佩傾然醉相盼彼我弁者色不變以口承
露不肯嚙終然貞白難自薦獨向西風抱
清怨

錢惟善

字思復號曲江居士錢唐人

折楊柳

何處好楊柳
板條送遠行
花飛渡江水
客醉踏歌聲
秋色悽榆塞
春陰接鳳城
一株不敢折
爲近亞夫營

洛陽陌

驅車洛陽陌周道何逶遲
玉帛走侯甸金湯固城池
潘令好桃李阮生多路岐
銅駝臥荆棘索靖獨先知

錙

堪

字子輿嘉禾人

擬古

千金買明珠百寶裝帶鉤
寶帶縮同心明珠垂兩頭
美人結新歡託體相綢繆
再拜稱主壽特以奉千秋

鄭

基

字本初三山人

白苕詞送謝升父

征鴻至征旆舉花發芙蓉滿江渚吳姬約
雲歌白苕凝爲朝雲向君舞牽絲鳴玉張
宴遲稱觴聽曲心自怡君之別會有期

王逢見前

費夫人

夫人姓費氏諱元琇江陰州知事
朱道存妻也

青賞花白蒲水黃雲日黯慘風悲涼停轡

西向三酌觴旂旌葆幢來渾茫若有人兮
凜如霜星流電馳惟可望微言宿習大洞
章功成拔宅居帝鄉鵲河蟾竈肆翱翔
咲援北斗挹酒漿帝曰欽哉無太康下爲濁
世扶綱常進規退矩禮自防釵荆裙布即
孟光尊姑養之植德堂朱氏堂名堂階珠
樹聯瑤芳明璫蒼珮森琳琅搥鐘考鼓樂
未央楚氛遮天耀天狼飄然歸寧父母傍
正坐漆屋憂葵傷官兵寇我如劍鏗昊天

倚杵海變桑身有澱血無回腸稽首再拜
淚如滂輒爲直上驂鸞皇

趙氏二女辭

女山陰游鯉山人至正十二年冬
寇至懼辱投溪水中死

游鯉山高屨頑游鯉溪水清洄灣中有峩
峩青髻瓊望如春雲不可攀壬辰仲冬寇
蠶起乳鳧將軍先披靡民人顛連社稷圯
我固當爲貞白鬼后来小妹復被驅亦葬

魚腹全其軀山高水清幾千載虹月夜貫
摩尼珠夜深鮫宮屏機杼風吹艸寒觸髓
語何由生長江沱間及見王睢鼓雙羽願
回堯天行化日女子有家男有室地下甘
心燈似漆

鄧

梓

字文若江西人

錦雉圖歌

錦衣繡翼何揚揚，棠梨花開春兩香。雌雄
並立久未翔，只尺或是山之梁。林深枳棘

如人長摩挲竹枝思鳳皇

徐士榮

字仁則號五雲先生章安人

新街曲

東街南曲聲婉揚西街北曲聲激昂佳人
唱曲不下樓下白馬青絲韁昨日開筵
擊鼙鼓今夜合席調絲簧樂聲亦似曲聲
雜人意豈如物意長祇恐樓上人春光不
長好寧知馬上郎金壁非重寶向來恩愛
江水深一旦殘花與衰艸

李

復

字道原號菊莊老人寧海人

弔烈婦

烈婦身可戮烈婦之身不可辱十年夫婿
從遠征夜夜青燈伴幽獨豈期淪落兵戈
林長鎗列戟森如竹將軍手刃秋霜肅烈
婦怒視不轉目分甘一死無生還烈火何
曾燬真玉妾心匪石不可轉妾心匪席不
可卷捐軀念欲赴江流回首不堪江水遠
誓將貞白歸黃泉烏肯偷生求苟免若將

顏色事他人為誰終身懷媿覩貞魂願逐
劍光飛妾今視死猶如歸人生天地誰無
死一死日月爭光輝我哀烈婦歌此曲萬
古清聲動澆俗烈婦絕勝烈丈夫丈夫臨
難猶畏縮懼死多忘食君祿回想烈婦徒
慙慙

周之瀚

字申甫雲間人

送馬秋野千戶出征淮西

霜原晶晶秋草衰西風烈烈吹大旗酒酣

仰天數過鴈落日滿地青山低時難不作
昇平夢半夜龍困匣中動此行乘雪蔡州
平書生擬獻平淮頌

阮拱辰

天台人

白露引

并序

至正己亥夏大旱至八月六日天
氣鬱蒸雲勃怒起衆謂是日為白
露節是日雨苗秀且實言已震雷
雨降民相顧怨咨若不能生者噫

世之顛連困苦冀以求活于人者
安知其非白露雨也作白露篇以

□雨師

白露雨民無辜小民憂旱籲且呼三月望
汝眼欲枯汝來今日何為乎不為我祥覆
為我殃害我田穉甚于螟蝗嗟爾雨師兮
罪不可量上天憫下兮仁德孔彰願挾汝
兮訴帝傍臬汝首剝汝腸祈豐年若雨暘
坐見赤子歌樂康嗟爾雨師雖死兮其誰

汝傷

雷擊虵 并序

至正辛丑夏予自瓢湖南放舟絕
湖口而北時雲日晝晦天西北有
龍蜿蜒下垂雷怒若擊物狀舟人
曰是龍下取水雨且暴至乃泊舟
別渚見有虵當傍近地長可十尺
許俯首不敢動舟人迫而視之虵
且死矣予竊意是虵從間出草莽

中搖尾肆毒使不遇真龍在天則
為害有不可勝言者雷之擊虵者
有以哉因喜而賦曰

維龍其神為雨為雲以利我耕耘以育我
下民彼虵弗仁雷其震

彼虫之毒維虵與蝮以嚙我草木以傾我
陵谷維龍弗伏虵弗育

張

樞

字夢良陳留人

將軍歌

將軍走馬沙草場
獵龍蹠躩鷹飛揚
狡兔之窟四顧無藏
置量如雲箭如雨
滿眼禍機寧脫此
將軍一日歡且直
百兔死君不見
李斯非相材上蔡
東門游獵子

釋繼善

字絕宗會稽人

大雪行

冬十二月歲庚午
江南雪深一丈許
衾裯斗粟何處尋
凍餓飢民不開戶
妻啼兒號面西東
天高聽卑欲誰訴
去年一極旱火

赤今年一極大雨注官倉私廩例空虛蒼
生何以守環堵西北風塵未盡消道路豺
豕又含怒明年宿麥縱連雲揮涕無從扣
箕禹凭誰寄語東諸侯恤民有道無輕舉
君不見曩時桑大夫慘刻祇取身滅誅又
不見只今曹黃須擢髮數罪憐渠愚

釋必才

字大用天台人

即事二首

負郭有田多不種，熟軍收要民送明年

誰復事犁鋤卒歲渾家受飢凍忍飢受凍
可柰何直須檢刮焚其窠去學短衣帶刁
箭倒刮他家養良賤

其二

泗州倉教飭雀鼠官有舟車難運取蠅屯
蠓慕急要糧巨室大寺遭鞭楚捧土懸知
難塞河檢家掠路傷民多分兵兼程走其
下就倉食粟如之何

無題

啄木吟

啄木啄木穿林簌，汝非攫肉又不啄粟。
何獨蠹魚便爾欲樹枯，不復榮蠹死還再。
生汝能食蠹，不再生我奏天子，褒汝繡衣。
使者之嘉名，免使蠹木為薪蒸。

新娘娘

新婦調羹湯，小姑繡衣裳。新婦不停手，小
姑不下牀。新婦語小姑，爾亦不自量。爾年
二八餘，寧久阿母傍。請再繡針底，文彩覆

鴛鴦春風一朝起，持贈畫蛾郎。爾姑別我
去，如我事姑嫜。

范

立

字叔中錢唐人

遠遊篇

仙人手把金芙蓉，邀我上陟蓮花峯。兩眼
注入滄溟東，浮雲遮斷扶桑宮。白日西飛
恐成晚，架天五色橫。長虹鳳皇儀，羽備珍
彩欲集不集，無梧桐冥，杳，脫羅網亦
有數點南飛鴻，怒鯨崔嵬鼓鱗鬣，浪中瑣

屑多沙虫從今喚起雲中龍披虎豹謁
九重舞干羽息武功泰和世上皆春風是
時勒名留鼎鐘左招黃綺右赤松長歌歸
去來山中

賦三色梅花

姑射肌膚白于雪夜出瑤臺看明月羅浮
仙人醉臉丹咲跨彩鸞下銀闕相逢同過
金母家金母小玉名俊華一色羅衫染蜜
褐仍帶絲囊盛紫霞珊瑚鉤起真珠箔玉

笛吹殘風色惡群仙俱怨老容華斑斑淚
向鮫綃落

月夜調琴

橫琴獨坐花間月天地冰壺夜清澈鳳皇
棲老碧琅玕蹋碎瓊瑤六花雪斯須化作
蒼龍吟風生太岳秋陰有美人兮隔雲
漢調高柰我相思心

瞿

智

字惠夫崑山人

從軍行

年少去從軍妻兒生死分
弓開孤月影劍射七星文
解識風雲氣能穿虎豹羣
不將身許國何以樹功勛
破敵三營外城頭日欲低
舉烽連磧遠戰氣接雲齊
旗幟驚鳥起鏡箭雜馬嘶
祇愁千里月少婦正悲啼

徐孝基

字立本章安人

見群龍歌

辛丑夏至日賦

玄黑崔嵬半空黑大龍蜿蜒小龍直天瓢

倒瀉銀河懸海氣空濛海波立頃更復有
三四龍威稜氣勢如群雄雷公擊鼓玉女
咲飛烟烈焰飄長風維時一陰凝下土六
龍在天啓坤戶陰陽剛奮無停機久旱終
當沛甘雨我方扁舟湖上行見之頓覺雙
眼明茫茫真宰不可詰乃知神化能通靈
君不見葉公好龍妙圖畫一朝忽有真龍
下可憐辟易走且驚不識真龍足悲咤
大雅集卷之二

大雅集卷之三

天台賴 良善卿編輯


會稽楊維禎 蕙夫評點

陸居仁

古意

采蓮多芳草種豆雜艾蒿馬齒似蕙根魚
腸渾鈿刀舉世方好竽錦瑟將誰操已矣
屠龍技終身徒自勞

其二



王孫玉抵鵲公子金抵蛙夜光投暗室綠
耳困鹽車燕石錦十骸楚璞刑再加哲哉
待賈翁懷寶無嘆嗟

李坦之

李太白酒樓歌

漂陽酒樓春水涯白也繫馬樓東家千金
醉盡不復惜猶吹玉笛引吳娃日斜樓外
春風起春愁滿眼楊花裏高歌一曲下樓
去傳遍江南數千里錦袍綠水迷蹤跡落

日空梁照顏色江頭盡日不見人樓上幾
年無此客倚欄仰看西飛雲如何不飲憂
其身只今寂寞千秋後誰酌采石江邊坎

山中苦寒歌

深山苦寒弗可居門前積雪三尺餘陰厓
一夜石蛻骨寒溜萬瓦水垂鬚道人凍臥
山之麓莫藝松明煮溪綠山陰孤棹期不
來夢入幽巖聞折竹征西將軍持短兵馳
馬夜渡黃河水關東諸將面欲裂嚴光獨

弔桐江雪

悲戰士歌

吾聞上古無爲天下治兵車首自軒轅氏
湯武爭王起征伐秦併山東乃稱帝亂世
英雄力排主四海生靈血塗地中原落木
風颯々一度興亡一度秋乾坤百戰日月
黑太華不動黃河流玉關旌旗拂太白王
師萬里開絕域春風草綠師未還鐵箭飛
書問消息功名不顧萬戶侯富貴不顧千

金裘但願朝廷有道烽燧息結屋深山看
青壁

李

哲

字公毅魏耕雲前進士

韓之盧

韓之盧猛捷世所無利口疾足逢時需
以糠粃飼以稌感激意氣心力輸平原八
月秋艸枯呼嗷詭遇當前驅東郭之魏衣
褐徒食邑郊地承其初爾祖于戍封時俱
不侵不暴穴以居爾窮其啼禽鳥俘盡室

大雅三
三
纍纍所屠逞心得雋名欲沽北山有猘
猘南山有於兔大爲民害爾勿除聞其腥
臊安尾逋觸邪既無獬豸德仁厚又不慕
騶虞畏強凌弱心何如上天好生爾好殺
逆天罔道天必誅一朝惡積殘其軀形骸
狼籍磔路隅傍人不恤掩鼻趨有孀其雌
哭呱百獸率舞嗆呼

孫華

宇文子貞至驛爲松江諸色田糧事

賦古詩贈之

朝行谷水東莫行谷水西谷水日流驛
舟日來驛舟來不已波浪日一起
朝行谷水西莫行谷水東傍人指驛舟
中有春風春風吹谷水照見桃與李

商人婦

妾年將及笄嫁與東家兒東家兒販江
西夫婦五年三別離江西娼家花滿蹊不
知今年歸不歸春來還爲作春衣滿院楊

花雙燕飛

楊

基

字孟載蜀人

黃鶴生歌

君不聞眉山道士徐佐卿化爲黃鶴朝太
清還君金僕姑留得千載名又不聞穹隆
小仙徐子貞翩翩自稱黃鶴生鍊形蓬萊
山鳳臆紫燕膺千有六百年飛上白玉京
白玉京錦貝闕十二樓五城娟萬青娥
吹笙來相迎黃鶴生骨相奇金衣玄霜裙

纖指而洪髀不飲華池漿不啄青田芝恥
彼五色鳥覽德輝下之浮丘不能招八公
不敢騎飄然從西來不使上帝知帝遣紫
虛元君魏夫人夜乘白鸞來相追琅霄頃
刻九萬里追之不及鸞聲悲黃鶴生請稍
留爾爲黃鶴舞我爲黃鶴謳便須吹玉簫
登爾黃鶴樓高幾百尺見三島十洲瓊
珠金光草鐵網珊瑚鉤樓今已推碎瓦礫
三千秋黃鶴生孰與儔毋乘腰纏人扶搖

上揚州揚州瓊花已枯死仙人不復來追
遊黃鶴生鉗爾口毋啣紫泥書寄與西王
母王母見爾咲起作小垂手黃鶴生爾來
聽崑崙十二峯朵々芙蓉青上有雙羽箭
金鏃孔翠翎我爲取之來射此天狼星坐
令談咲間四海烟塵清爾亦策爾勛我爲
爾勒銘更呼薛少保圖爾雲臺形黃鶴不
肯顧長鳴掉頭去路逢鐵龍君疊々道其
故龍君勸不止竟觸龍君怒手挽黃鶴衣

醉叱黃鶴住黃鶴不敢去飛遶三華樹夜
深龍君睡不醒黃鶴高飛不知處

董佐才

題考功掾金華范景渾風木圖

金華范氏忠孝門天道福善生賢孫苦云
父母壽不永三復伊蒿如事存結廬墓門
秋復春悲風拱木偏愁人弱枝凌空根入
土根猶父母枝猶身木雖欲靜風不止子
雖欲養親不俟由來大孝慕終身聖稱虞

舜賢曾子去年辟試銓曹史回首鄉關二
千里畫得墓門風木圖比作座銘懸旅邸
風吹宛似聲蹄呼木身未著涕淚枯目之
所至思所起百歲一日心無殊召公甘棠
武侯柏惠澤在人尚惜晚節移忠顯令
名報取劬勞恩罔極

方寸鐵爲盧仲章賦

方寸鐵百鍊剛吹毛劍鋒秋水光鐫勒妙
假吾竹房倒薤文連環鈕通侯纍纍懸肘

後伏龜趺蟠螭首頌德紀功垂不朽鐵名
已著霜滿顛復得鐵業傳二雛勿劉元祐
黨勿刻諍瘕符何如往補石徑缺萬古六
書存楷模天下英耄知所趨伊誰之力丹
丘廬

董

紀字良史

短歌行

山鳥日々喚提壺勸君酒盡須更沽千金
五花不足惜莫計囊中錢有無人生百歲

幾時好大是愁多歡樂少朝見開花莫落
花昨日朱顏今日老爲君起舞爲君歌當
年不樂柰老何

紀夢

夢中挾飛仙與我肩相齊手持綠玉杖脚
踏青雲梯彈指天門開天家難久稽培塿
視三山九州一丸泥蓬萊自清淺海水忽
流西金雞半夜出又向扶桑啼

張

樞字夢辰

生日自責

西有濯錦江東有自滾湯南有樹釀酒北
有地種羊我生四維中曾無一線長仁獸
乃騶虞瑞鳥爲鳳皇帝江解音律火鳥識
興亡我老嗜書史壘壘空文章聖德不暖
席賢知亦賣漿飯牛百里奚誣金同舍郎
我何端一隅跬步費籌量緹縈小女子有
策陳未央姬滿甫髻鬢對言如珪璋退耕
力不任進升心未遑我髮日種々我生日

茫々頽然六十翁宇宙須眉蒼一子峭孤
立力穡不救荒三弟各奮飛食祿天一方
今年耳重聽兩眼無童光長咲却秦兵大
哭救楚王少不同鶚薦老無事鷹揚今日
屆初度妻子具壺觴坐我方惻然置身桃
李傍肴核雜陳前旨酒弗願嘗聽我心中
辭援琴彈慨慷父母生我時艱險且徬徨
三日不蓐食俾整棺衣裳皇天與后土覆
載德汪洋展墓渺何許望望白雲鄉惟有

罔極恩九死不足償妻兒悉我意嗒然摧
肝腸請從事斯語沒身不可忘

高

啓

字季迪平江人

明妃曲

都門塵拂春風面臨別看花淚如霰君王
惆悵惜蛾眉不似前時畫中見白髮呼韓
嘆漢恩寧胡漫踟闕支尊羶裘肉食本異
俗不如但嫁巫山村黃沙漠々無城闕指
冷鷓絃夜彈歇相隨萬里到穹廬只有長

門舊時月妾語還憑歸使傳妾身沒虜不
須憐願君勿殺毛延壽留畫商巖夢裏賢

秋江曲送顧倅之江北

秋江月滿秋潮大江上行人待潮過別離
休說渡江難半日順風舡穩坐楚鄉茫茫
葭菼平使君來時雄雉鳴子弟從軍渡江
去幾時猶住夕陽城水田雖荒飲常足茨
米夜春三十斛誰道繁華不及前戶無征
稅官無獄渡江渡江君莫留北江樂似南

江秋

劉原俊

字用章浚儀人

過歌風臺

六國無人祖龍死布衣提劍山東起八年
置酒未央宮千載猶思復田里風飛雷厲
來咸陽錦衣其如歸故鄉登臺作歌醉眼
白俛視四海諸侯王寂寞河邊一丘土烟
樹蒼茫接齊魯行人何必重傷心世事回
頭今亦古

安將軍歌

安將軍紫髯鐵面多戰勛猛氣散作西山
雲前年紅巾入城府赤子滿城誰父母將
軍血戰城東門五百健兒齊奮武更有大
郎猛于虎身屬橐鞬寶刀舞打馬奪橋入
賊塢殺賊盡作河邊土將軍父子真有功
今日渾如筆盡空將軍功豈不好弁山入
雲青不了

朱

堂

字育堂

解婢辭

山翁有老婢凶歲家窮罄十千質之歸用
以司晨炊醜惡固不論病贖殊非宜指揮
失西東百喚不一知主母大叫嗚烏用癡
婢爲回頭謝母翁聽婢前致辭婢也病不
聰婢也誠非癡世情惡察々偏聽生姦欺
鄰生入幕賓臥吐王允之紛々牆壁間屬
耳干人私毀床驚螳鬪渡冰咲狐疑作勞
暮夜鳴齋續左右規凡此非婢病婢病良

可醫奔趨及語言所恨見事遲口目且順
後手足可運持幸毋怵迫驅假以寬緩期
猶堪備汛掃或可貸鞭笞况在蒙莊書亦
聞老聃師五音令耳聾六鑿使性移不瘳
亦不聾聚室能無疵有耳未足喜無耳未
足悲此疾何足惜此理端可推翁母聞婢
言失咲幾解頤勿輕聾婢瘳更謂聾婢竒
明年社日來乞酒為爾治

萬

權

字仲衡

兄入甕

來俊臣與周興對食問囚不服當
何如興曰宜置炭熾甕人居其中
無不服俊臣出內狀曰請兄入甕
炭山高赤如血炙天々欲然燎地々欲裂
火鴉亂飛鐵甕熱請君投箸坐甕中髀骨
焦枯自為孽魘鼠捕狸鼠技竭蛛絲羅螿
蛛先滅甕中人嶺南別

毋提刀

僕固懷恩謀叛不朝歸白其母
提刀欲殺而教止之

毋提刀泣且教臣當死忠子當死孝天王
待汝恩不薄食邑太寧頒紫誥兩虎爭百
獸咲我欲為國除殘馘剗爾心謝三軍斷
爾頭告七廟嗚呼賊子何煩老吾老

釋仁泚

字象原

關山月

白楊風蕭々胡笳樓上發壯士不知還羞

對關山月去年天山歸皎々照白骨今年
交河戍明々凋華髮交河水東流征戰無
時歇斗酒皆感歌々罷淚成血

沈

禮

字原禮

題蘇小小墓

歌聲引迴波舞衣散秋影斷夢別青樓千
秋香骨冷青銅鏡破雙飛鸞飢烏弔月啼
鉤攔風吹碧火々不滅山妖哭入狐狸穴
西陵墓下錢唐潮々來潮去朝復朝墓前

揚柳不堪折春風自縮同心結

釋行方

字行紀嘉定人

顧玉山草堂席下寓興

春暉樓頭春最早主人宴客情更好萬斛
蒲萄瀉綠波一色氍毹剪芳草捲簾山色
何冥冥吳天半掃蛾眉青亂雲忽起倒壓
白日停野狐啼烟道路黑海風吹雨蛟龍
腥短歌長吁傷我情門前溪水聲冷

董佐才

青藜杖

應試

北斗城頭風露涼閣名天祿隣未央卯金
之子校書倦嘿思周孔叅羲皇黃衣老人
叩前進青藜杖端吹火光如崑山燭龍
照几席烟鬚眉蒼共談來今及往古義
理玄奧辭精詳自非神功俄頃助經籍至
道淪微茫太壽靈壽謾榮寵葛陂龍竹徒
荒唐豈如天上有太乙能使人間文運昌
雖云過眉尺度短扶持聖教千年長當代

人才亦豈少好著更生居玉堂

俞

鎬

字孟京雲間人

擬古

李白一斗酒慷慨詩百篇一時縱豪放意氣凌青天帝降輦迎天下稱其賢悠千載下此道匪不傳

其二

漢祖雲夢遊當時曷為意執信繫之歸封以淮陰地一為陳豨謀功業已遠志悴焉

煩聖憂忠良勿宜廢

其三

昭侯愛敝裘勿賞徒咲嚔孔明誅馬謖克意在經綸一以待有功一以示無親罰賞苟不濫大業崇千春

其四

魏紀未云父司馬懷其壘骨月復相殘敵人遂蠶起中有慕容氏崛起乘間起覆轍勿復蹈鑒之在青史

顧 或 字孔文

塞上曲

燕山蒼々塞上紫雪花如沙月如水穹廬
酒煖貂裘温匈奴角聲全部起將軍彎弓
髮指冠指墮馬蝟心不寒士卒並持蘇武
節首魁莫作李陵看

刈管

刈管種冬葵々生管亦生再刈葵必傷置
之管復榮地力既已竭灌溉亦非輕終焉

同草莽何以慰吾情刈管當刈根始謀在
深耕

余 詮 字古平撫州人

春夢軒

池青草色暖蝶曉花枝滿花滿復花稀春
歸蝶亦歸蝶歸春香々春夢何時曉推枕
看東風幾人春夢中

袁 凱 字景文松江人

蚊

羣蛇戢々方鬪爭蝦蟆蝮相和鳴百足
之虫行無聲毒氣着人昏不醒蚊蚋雖微
亦縱橫隱然如雷殊可驚東方日色苦未
明老夫閉門不敢行

吳

哲

字子愚號淡雲野人華亭人

題西省掾王繼善望雲圖時親居錢

唐

掾郎思親仍好奇野服矯首天之涯白雲
何處是親舍吳越山橫雙黛眉當時釣游

在親側縱逐風雲上京國一爲微名歸不
得兄弟無人慰顏色漫把羹牆擬白雲白
雲聚散愁紛紜九江秋早稻田熟負米趨
庭手自饋

過襄洋河

襄洋河何湯々奔流百折到瀧岡砂磯灣
々里路長舡頭照見落日黃愁雲低沒雙
鳧翔檣烏孤征西徬徨遙空半作明月光
涼風忽來吹我裳荻花夜白含清霜襄洋

河思故鄉

雪夜有懷范玉厓升中朱滄洲孟辨

作

江南地薄雪併寒綠江矮屋茅復單折薪
束緼空燎眼春陽不暖先生槃西家利酤
常苦酸東家壚頭量子寬山公八斗烏足
醉少頃暫解雙眉攢門前柳花飛作團瑤
田珠樹森闌干鄒枚僵臥竟不起對此欲
賦誰同懽南州俊髦陸與韓躁進悞刷凌

雲翰售才既生急一官肉眼不肯空曹瞞
滄洲渺瀰玉厓噴岫二仙者流同余肺肝
進直任公鉤退屑淮王丹宗儒倡道富文
學妙斡造化歸毫端乃謂宣尼顏子不死
亦易事忍見後天日月凋雙丸今夕復何
夕三山皆白鸞我欲邀二仙授簡發漫汗
仙兮素愛我御風諒非難戒兕預沽客一
石此醉要吸六合萬頃冰壺乾

寄閩中兄子昭

日落咸池西迴光麗幽厓陽精有時下死
草生春夢鳳羽亦翔集鳥啄相和諧脩名
在早晚君子慰中懷

其二

有客扣我門手送閩中書我懷相感發憤
樂在頃臯征途問生死加餐安起居樂只
父母心富貴將何如

王逢

題曹煥章松筠軒

煥章踈采芝生雲間人事親孝好
古博雅善書畫過其所居松筠軒
時煥章謝病却掃意晏如也壬子
夏因哭母喪明作詩以贈

蒼髯之官直節君曹生落落日與群上園
傲兀歲寒月几簞颯沓陰涼雲天風冷然
露清洒山人曾來坐其下谷水秋高一鶴
飛門前過盡黃塵馬

大雅集卷之三

夕陽

夕陽挂紅鼓強半浸綠水斯頃日漸下堆
阜參差起老夫岸中坐併入圖畫裏新
無停機擬議亦非是人間希闊事終有變
滅理如何曠土懷眷不能已

倪

瓚

字元鎮

送李徵士過荆溪訪王司丞

何處尋狂客故人王子猷花落庭前樹風
吹溪上舟紫筍生春雨綠蘋滿芳洲心隨

酒缸發悵望不能休

送李徵君還揚州

二月桃始花淮南客還家階前踈雨落堂
上春衣薄爲言沈約在吳中玉壺青綠酒
如空春風相過蕙草綠芳菲滿堂樂未終

錢

璧

字伯全華亭人

贈瑞雲林上人

英、谷口雲鬱、溪上林形影偶相值去
留復何心握筆攬秋思倚窻延夕陰誰云

市朝遠亦足慰幽尋

鄭基

字本初三山人

擬梁簡文五七言體送鐵文彬左丞奉

召還京

將軍功蓋世揚威淨海隅
蛇矛縈後騎虎衛役前驅
三門開地甲八陣轉天衢
鐃鼓潮頭響竿旗日下趨
飛梯攝暗島合璧示宏圖
降醜尋封奏

帝庭璽書嚼鳳落青冥再召伏波歸闕下
南荒銅柱已鐫銘駢々返駟馬黃河春始融
輕風流碧塞晴日炫彫弓柳坼秦山麗冰消
泗水通錦鶻窺長坂白鴈墮春空黃封將法酒
羽檄候元戎麟閣圖形已預知更應設帳會瑤池
夕斂花光歌吹歇御帖重頒紀宴詩

李

珪

字象賢寧海人

和友人過西郊韻

秋原晚蕭曠杖藜荒徑微川迴衆鷗集天
清孤鶴歸寒烟蔓艸密積雨豆苗稀臨流
擬結構息鞅振塵衣

釋萬金

字西白吳郡人

過千里田家四季圖

桃花浪已深楊柳風猶弱鄰曲欣往來逢
迎勸耕作健犢不自暇老農良有托共醉
社日尊陶然得真樂

其二

蠶事方告成鳴蜩有新聲插秧雨初遍洽
艸日不停雜坐高樹陰解衣午風清作勞
時自逸孰謂非常情

其三

湛湛露華白蕭蕭楓葉殷黃雲已半斂玉
粒終不慳官賦戒早輸農家期暫閑酒熟
互招飲只在隣里間

其四

欣逢大有年困積庶稍豐滌場已十月朋

酒邀諸翁處，歌擊壤熙熙。詠豳風兒孫
自生長樂與堯民同

釋觀通 字希遠宜興人

壺中荷花

愛此荷花紅天然，非雕飾披妍。令姿停
暎清漫風引，茵蔯香露含。珊瑚色寘之
白玉壺光輝滿，瑤席

周砥 字履道

吳越兩山亭

兩山夾江水，孤亭橫翠微。吳雲與越鳥，千
古不停飛。風厓洒松瀑，月壑舞羅衣。王氣
未消歇，霸圖今是非。長歌一盃酒，掃席延
清暉

王逢

題顏守仁竹石圖

廣文窮益堅，竹石硯池出。勢却虞人旌，籟
隱伶倫律。渭川春暗雨，淇園寒落日。鳳深
蒼梧雲，茅簷花復室。

題俞東岡六有齋

隱居古善人中歲稅塵鞅座陳五經傳
捐揭六有榜儼若上帝臨於焉岱宗仰
所曛貴循度瞬息戒或罔賓師臯比擁
兕孫蚌珠朗將見一家學鄉術春浹盎
世方驚虛遠俗復競浮獎不圖窺橫渠
帶航排風上子嗟清流輩既悼八厨黨
何堦名教間浩然獨還往月林函踈影
溪嶼臻灑爽良觀非後遲朋酒置犧象

蘇大年

字昌齡廣陵人

題萱花園為賴善菴賦

亭々萱艸花歲晚顏色好興言北堂陰
樹之可怡老懷歸々未能遊子悲遠道
披圖歌白雲天末飛鴻杳

曹

睿字新民永嘉人

贈顏守仁

吾友夢谷生其人美如玉平生鐵石心
剛介不可辱寧甘首陽貧寂寞在空谷
懷哉

能幾見高風激流俗

買

閻

字兼善會稽人

述懷

流光何駸々瞬息不我待憶從越山來忽
復廿餘載羈栖迫險艱形容爲之改世澤
嗟僅延生涯念何在冰霜歲云莫憂端際
滄海積陰韜日月矯首重興慨願效商巖
翁行歌紫芝採

葉

杞

字南有京口人

感衷

貢賦通重譯耕桑被九垓歟驚氛侵滿不
謂歲時催丞相興師出綸音降使開紫泥
封五采黃道繞三台燁々宣光業桓々李
郭才陣雲連朔野廟畧定風埃香糯江南
餉蒲萄隴右醅群馬金匱匝毳帳雪毡毳
劍動彭城潰珠還甓社來長驅危破竹密
令疾騎枝王者征無戰群雄執欲摧忽聞
君命召竟勒將旗回中夏捐雞肋清朝隱

鳩媒義聲從此逝銳氣一時灰天迫威弧
弛城孤盡角哀火狐翻嘯聚海鱷復喧
歎附真遺患除封實戲孩民情猶耿惻天
討尚徘徊憂憤飛神爽瘡痍暎淚思衮衣
徒倚注肉食自輿僅河漢明如洗崑崙豈
易頽孰矜黃鵠志羞上野鷹臺微効寧無
念篇詩信漫裁霜晴野空闊獨立望蓬萊

董佐才

字良用

題華亭朱孟辨篆冢詩卷

古初無毫楮義盡何由傳孰知文字理已
具河圖前神農洎蒼頡俛仰極人天穗書
與鳥書創制分后先龜疇錫禹時盤銘著
湯年岐陽紀石鼓史籀稱獨賢矯首蛟龍
蟠鬱若鎖鈕連科斗聿行漆形體目自然
一從孔壁廢重爲經籍憐秦相約籀古撰
次蒼頡篇小篆遂名家勁健含姿妍登封
及詛神金石紛雕鐫下逮隸八分變化如
雲烟漢經煨燼餘文教仍敷宣保民存六

書學僮纔九千楊雄纂竒字杜林解探研
繼踵非無人意氣莫不全偉哉許祭酒蒐
羅歸簡編墜緒賴復舉後學知相公陽水
克遠紹鉉錯造其玄近代吾與周筆勢回
奔川華亭朱茂才好古喜欲顛一掃世俗
書習篆忘食眠秦望并之罟碧落無新泉
小者案間列大者屋壁懸平生囊橐賞多
充買碑錢功深學既精齒壯志益堅池魚
染皆黑鐵硯磨將穿摹榻累萬番期羌古

人肩師法正在茲什韻比蹄筌孫樵文自
祭智永筆忍捐前脩不我欺我癖尤難痊
峩峨細林山上與浮雲連譬彼汲冢書函
之瘞其巔聚土對若堂劉石表爲阡其陽
碧樹交其陰書帶綠山靈謹訶護有名如
有仙揮洒人間者顯晦名非偏寶劍賈胡
發玉柙蔓艸纏如何篆冢光夜々映星躔

王

逢

字原吉

沈一中清友爲脩秋堂風露琴先寄

是詩期過最閒園夜宿

一日焦尾脫十年孤鳳暗忻遭運斤手妙
得斲輪心溪館茗烟薄石床蘿月深携之
肯枉顧側耳陽春音

淵明把菊圖為居士遵誼題

解官賦歸田把菊秋風前顧問劉寄奴何
如傳延年

大雅集卷之四

